



琴士詩鈔

卷七

涇縣趙紹祖著

孫同璋曾孫

鵬飛
蛟起

同校

送藍山僧卽柬章省三

老僧展具便出門飄然已是春山雲雲來雲去何
定在出藍山兮歸藍山藍山之山如碧玉老僧山
巔結茅屋屋邊太白放歌臺篆痕深帶蒼苔綠落
星潭石當山前潭光遠與桃潭連汪倫萬巨今已
矣潭下空流千尺水欲騎白龍問舊游因師寄聲
報章子

和肖巖四叔觀八關齋石幢之作

老阮詩稱霹靂手示我長歌得未有開元古寺轟
石幢親到其下摩娑久當年田帥一世豪汴宋八
州俯在牖沉疴櫻體忽得瘳官吏軍民共奔走八
關齋會飯千僧爭先祈禱誰敢後顏公作記并作
書鐵畫銀鈎字如斗禍生廢寺大驅除災連此幢
遭擊掊崔君雅意能搜竒古刻重摹傳不朽但知
愛惜比球琳誰分真贗憎貂狗我生嗜古如嗜痴
翠墨醉心如醉酒淋漓入紙任縱橫上下千回紛
左右咨嗟筆勢大權竒欲讀不成捫以手強將文

理推點畫得其一二遺八九深憐黑白間如癡遙
識觚稜半成日不從史冊想英風誰云金石能久
壽作歌相報寄太息非敢效顰爭好醜

附原唱

我生不識顏真卿但從青史知忠貞開元廢寺
依宋城寺前石幢題公名幢高八尺橫八稜八
百十字騫秋鷹細讀跋尾私撫膺會昌大中紛
變更真蹟亡難勅六丁遺文重勒煩登登如人
已死留圖形真贗貂狗誰敢憎憶昔田帥誠豪
英負疾得瘳天所憑西方土木曾何靈散錢解

衣爭輸誠上自官吏下編民伊蒲盛饌招萬僧
香花贊唄喧郊垞八關齋名取永明此事荒唐
無可稱其人其書吾所傾中州金石文堪徵漢
碑唐碣高崢嶸一自金元紛鬪爭詩書禍似遭
焚坑空傳邊相老子銘誰見褚公遺教經此石
幸不燬于兵靈光巋然昭日星爾來河水經南
行秋臺幾與平臺平有時泛溢穿千塍泥沙高
已埋碑亭蛟龍偷負縱未勝或恐石泐似解冰
字體剝落讀難成我來訪古攜兩朋諦觀水痕
心尙驚何當遷此居高陵永與後人留典型時

無張翮嗟誰能

題吳柳門家山圖

水西山色亦頗可我往看山山笑我東南徧地皆
名山胡爲卜遊常不果吳君家住奎山邊日日登
山枕石眠愛山惜山不肯捨披圖縮山入一編人
人題道家山好我謂吳君休草草意氣方高泰華
巔何堪株守家山老勸君賦就凌雲詞金鼇背上
好題詩飄然不負山靈約他日歸山自有時

僧古巖索再題巖關圖

巖關圖成十餘年我最先題四十字巖師挾之走

四方上楚下吳凡幾至騷人墨客富篇章巨公名
 卿多紀識既驚碧海掣鯨魚又愛蘭苕戲翡翠珊
 瑚木難紛雜陳馬勃牛溲未棄置倦飛一旦忽知
 還破衲依然入蕭寺手提一編擲向余君看寶氣
 盈吾笥長歌纍纍壓君詩有似黃河渺淮泗君其
 更作放厥辭寥寥未足滿吾志憶我大阮雲起五叔為
 師師珍重索詩將圖寄射石沒羽力已殫再寫蘭
 亭寧及醉積薪在下理固然買菜求添余敢恚倘
 使九泉人有知掀髯應笑師多事吳笏巢曰筆帶仙氣極似蘇髯
 伍某以古畫觀音像見示因記之

竒熱逼人無可逃片雲不動白日高伍生示我古
 畫像展卷不覺風蕭蕭亭亭趺坐竹林下扶桑曉
 色開絳霄龜頭鬼伯羅脚底地獄變相意態驕不
 知到今幾百載屢經煙氣香火燒縱饒破碎飛蝴
 蝶裝背已好完生綃當胸一手光采動乞與坡老
 猶堪豪米元章畫史記大士畫像云當面一手光采動人此畫當胸一手真異常光采也
 求我品題定誰筆不是道元亦朱瑤

朱母汪太夫人貞壽詞

妾雖有夫未見夫死願身作連理枝妾雖無子却
 得子生看兒到鳳皇池妾自盡妾心本不在夫知

琴一詩金 卷七
兒自有兒福亦非妾所期兒今顯名妾老矣吾夫
泉下其知之

與任位南奕戲作兼呈鄭書田

我奕日百枰君奕日一局與君一日奕剛有三局
足世人競好說神仙一奕往往成千年爛柯山頭
偶相值可惜采樵人不識局罷方知荷擔歸城郭
猶是人民非世間競羨神仙久如此奄忽亦何有
千年僅得一日長縱有億萬堪悲傷豈如我與君
日日相往復一局恨君遲百枰厭我速遲速兩相
當三戰日再卜如此十日未爛柯已抵仙人萬載

多谷口鄭君看不倦黃昏忽遇風雨電歸家不過

妻孥譴

吳柳門曰遊戲之
言中藏至理故佳

奉和洪北江太史游水西之作

先生下筆可以搖五嶽先生舉酒可以吸百川尋
常萬里不欲置懷抱何況區區涇山涇水一覽在
目前涇山涇水能留客李白題名尚在藍山壁藍
山山下落星潭直到水西同一色當年白自夜郎
還到此流連山水間千秋佳客山靈喜又見先生
天山萬里

恩賜環 恩賜環心如水平生祇辦遊山屐偶然

忽向水西來一笑題詩山啟齒與酣張眼向青天
應呼太白騎鯨起騎鯨起涇山涇水仍如此萬巨
汪倫俱已矣記取涇川趙琴士

題張簪山涵碧齋居圖

簪山善畫

先生家住黃山麓日日看山意未足山頭空翠滴
硯池涵碧齋中掣筆速山言先生苦愛山人同山
僻世莫攀不如橐筆出門去使人快靚開心顏先
生答言此意久明年買舟到漢口山莫嫌我獨出
山我將筆落驅山走

送鄭思贊還鄉

名佐廷

思贊本旌德人家于江寧今還旌德道涇
過我留一日

十年一別始一面還鄉馬足如飛電十年以前我
遇君秦淮閣上細論文君家有叔亦喜客見我眼
青見人白興酣落筆錐畫沙枯藤秋蚓入草蛇持
來換我一枝竹珍重裝潢掛君屋自從君踏燕山
雲我到秦淮不見君年年尙見君叔好竹猶在壁
吾已老吾老去年仍復來豈知君叔已塵埃世間
萬事駒過隙不如歸卧東山側今年今日何好風
吹君方到又忽忽古墨齋中一夕話天未黎明僕

夫戒苦言廿載未還鄉不然久別敢倉皇送君落
落從此去十年舊事俱入慮人生能得幾十年望
君君已隔山巔祇有淙淙流水蒼蒼煙

借榻湖山精舍二首

幾年厭俗事苦為俗人侵一旦離俗境到此無俗
心門前水流駸駸屋後竹植森森解衣磅礴多逸
興不知身在深山深

湖山蒼翠如作堆桓公祠對長河開山門一帶擁
千樹葉葉蒲帆樹外來山高千丈不易至但有泉
聲落平地會倩樵夫作導師一探山頭赤烏字相傳

山上有赤烏二年水至此七字

族弟孫年自北歸以

御製十鼓并周宣十鼓及張得天所書韓昌黎石
鼓歌拓本見贈慨然念舊遂賦此詩

先皇御筆鏘球琳周宣十鼓藉以珍藝苑流傳千
萬載與國天地同久存當年退之恨才薄出語
猶似雷崩奔法華庵主奮偉筆米老袖手坡翁瞋
憶昔秦淮偕眾英半千閣上飛清樽梅氏閣名風流絕

世佳公子都官之後白衣孫梅石居聖俞之裔定九先生之曾孫文穆
公之第八子手持一卷展向我秋蛇春蚓相屈伸四座

無言並愁絕有客起歎君不貧三十萬錢遂輕擲
不知誰人獻

至尊是時

先皇定石鼓物遇其時若有神

臨軒微笑頷龍頤扶桑喜氣開朝暉

御筆親題四大字分付太學勒貞珉墨光璀璨打

千本捧出惟

頒侍從臣斜封寶柙不許搨包裹何啻十重茵阿

弟三年滯京國征衫猶帶齊魯塵隨身一紙走千

里持來贈我驚老昏摩娑病眼強起舞對此還如

見故人仙源曾入尙凡骨自從一別難問津二十

餘年忽彈指往事入夢徒酸辛稽山賀老已黃土

石居物故十餘年矣酒船空掉涕沾巾

送周鴻軒北上

名之冕荆溪人

交君未見先以神相逢一笑坐我春軒然議論不

易馴有如舒卷青山雲詩宗李杜韓柳文楷法尤

能到晉人秦淮秋日車動塵英彥各各張一軍就

中疎狂愛我真美酒三斗飲君醇邇來落落音問

淪關山迢遞馳心魂蹙然足響空谷臻一旦剝啄

叩我門既驚翻怪何所因言有賢主能留賓

涇軍廳迎

散蓬無根豈意歌驪旋送君君今尙健非我倫此
去應不悲離羣大者射策動

紫宸小猶百里下牧民鴻軒本以保薦候
補知縣故及之杏林花

縣我有聞定將起舞鷄唱晨北風吹雪何紛紛知

君夜渡黃河濱翩然回首思故人時因鯉魚寄我

頻叔肖巖曰意態飛
動後半尤為神到

衛貞女

吾宗竒節事莫侶繼共姜衛貞女女拚碧血埋幽
泉此志此心昭來許我欲書之慘不得語一
解女年

十二許我族同燮同燮余
族再姪繫纓方有言摧玉何太

急圓鏡雖已破兩壁終未合人言女幼汝何知女

自閉門伏枕泣二
解摘我明月珠脫我繡羅襦捐我

膏與沐不言不笑如泥塗父母曰愚哉女衆曰女

何愚人皆集於苑汝何集於枯女曰各有志此志

不可誣三
解此志不可誣十年一瞬如轉轡十年如

一日面目枯槁形容癯朝隨母趨暮隨母趨趨我

庭隅祇見我父母不見我舅姑女年二十二起白

父母歸趙家四
解父言從汝志侍父會何妨母言從

汝志隨母會何傷女言極知父母愛女心不忍使

女歸空房作女離父母一日九迴腸此身不歸趙
 此身不分明解五父曰汝言是吾將告汝舅舅姑聞
 言傷且疑此事恐希有素車白馬逆女歸猶將觀
 其後解六女入門先告廟舅姑拜罷郎墓掃掩淚入
 空房三日入厨竈出執豕婦勞入彈寡女操昔為
 女孝今為婦孝人曰婦孝舅姑曰如兒孝解七寄語
 父與母女今得為趙氏婦古井波可揚南山石可
 走波揚石走志不苟食麤衣布空房可守影隻形
 單似天長地久解八天蒼蒼地茫茫九原不覓返魂
 香女也自矢奇節以章我書其事敬告采風慎勿

忘衛貞女繼共姜解九

陳旋吉以其先世畫像索題為作長句

趙子金陵三月客秋暮思歸將買舶陳翁剝啄斂
 我門向我索書手巨冊羽然展卷驚心魂一十四
 像何赫赫此翁先世那可輕自宋迄明傳一脉熙
 寧宰相難弟昆逮到長沙綿舊澤伊誰寫像傳世
 間翰林才子書畫伯陳魯南沂或豐而慈鬚小白或方
 而嚴面深赤或頎而秀色如銀或偉而奇髯似戟
 追神肖貌崇我先自附其貞肅且立畫十三幅皆
名字官閣於後最末一立像搢笏垂紳軒軒霞舉
不書名字官閣當是魯南自附其像

琴言金 卷七
曳輕裾搢笏垂紳光奕奕名公鉅卿多題咏真偽
錯雜宜持擇前有文顧後嚴孫遙遙相望無今昔
世人古物欽鼎彝况乃先世留遺跡陳翁世守三
百年於今寶弃如拱璧一絲一髮想精神世族故
家或不識翁雖市井異於人如此深心那易得明
日掛帆江上行爲翁高歌潮百尺

壽叔肖巖七十

維東有嶽北有斗維公偉爲學者首鳳皇池上掌
絲綸玉皇香案時左右手提玉尺到粵東五嶺靈
竒皆在牖翩然便賦歸去來宦味如斯不肯久公

之學行蓋有源不與人世競好醜在官定作大司
成歸來寧爲鄉祭酒今年二月屆古稀間黨咸稱
仁者壽豈惟鄰里烹猪羊賓筵合薦東方狗胡爲
屏謝卧禪關祇抱詩書相尙友維公立德更立言
欲與古人爭不朽聖經微意到豪芒三傳紛紜刪
八九譚詩直是匡鼎來說易能教五鹿走爾來註
禮批鄭孔斷制從心非在口訓詁義理見皆融漢
宋無須主誰某維公疾與君子同百年一瞥非我
有稱觴製錦何足云壽公當在千年後

和李幼心刺史題歐陽文忠公畫像

噫嘻歐公一去七百六十載滁人飲德如飲海豈
 惟豐樂醉翁二記矗立山中亭公有遺像至今在
 骨竒貌古方雙瞳衣如出水帶當風江湖不替廊
 廟志鬚眉皓皓真成翁上書二贊晁與李晁說之李端叔
 激昂時事安能已蛾眉謠詠生風波不礙白日青
 天總在浮雲裏嗚呼一代韓愈幾沉淪仁廟猶是
 聖明君回天一語有大力端賴當樞社稷臣皇華
 使節魏公似道出涂中懷桑梓翰林舊事藝林榮
 緣例恭呈請

天子江西裘文達公過滁攜像入京緣文徵明例以請高宗純皇帝親題二詩於上

詔還滁州停雲墨妙
 帝所許何況雄文大節昔無比煌煌
 天語五十六異代

洪恩照青史瑤函瓊笈不留藏馳驛歸滁滁有光
 滁山高高滁水長惟公精靈其徜徉蘭陵太守真
 好客懷嵩樓前浮大白手持長歌展向余四座賓
 朋齊嘖嘖君不見九老堂五賢祠公今已矣德在
 斯滁民敬公如敬父滁士敬公如敬師端命天慶
 埋芳草終歲奠公酒一卮

代縣令某祝鄰縣令母貞壽

山不巢鳥比翼水不游魚比目世間不平有如此
天挺奇氣鍾巾幗解一巾幗誰者奇且純乃是徐母
太夫人太夫人門閭今已賁

恩綸我思舊事嗟嗟苦辛解二苦辛如何傷我實多

良人大去之死矢靡他誓將從之奈此呱呱者何

解三顧此呱呱涕零如雨况復堂上有老姑那堪重

罹此茶苦三世一身責在于汝我不敢不代為子

我不敢不代為父解四為父如何畫荻教書為子如

何奉膳餽餘此生此心天其究圖天欲試之火延

厥廬解五火延其廬老姑寢在室良人柩在堂且亟

扶姑出身與姑俱心復與柩一撫膺一呼天何莫

我恤天不能災風迴焰息解六德既邵矣天其報矣

何以報之厥惟有子有子才為天下士昔也入列

仙班今出宰百里解七百里本巖疆母訓煌煌民安

物阜介壽共登堂松竹釀白玉觴風迴花片入酒

香忝任鄰邦如猶子行願進南陔古樂章解八

皖城喜晤汪芝亭太守芝亭名恩江寧人時為安慶府知府

與公一別三十載皤然相對皆成翁公言別後有

可告功在南江十萬松鄙夫貪心自世態書生迂

氣能天通芝亭以名進士為比部出為四川南江令邑柏楊坪鄭廟前有古松柏三萬餘

株皆大數圍某方伯伯心貪其利與芝亭商及此事
芝亭拒之甚力方伯怒委龔姓者攝南江篆會方
伯署中多怪異事芝亭請於大府與某觀察因緣
以去就爭之事得止方伯與龔令皆不日卒
果報且勿道相視一笑不言中鄧湘臯曰書生迂
氣能天通一語足

令人汗下

為鄧湘臯題松堂圖

湘臯名顯鶴湖南人

與君相逢江之渚日夕雄談到前古慨然示我松
堂圖君家大父讀書處翁騎箕尾去不還松留百
本屋三間虬髯古貌悵未見餘韻流風猶可攀我
雖年老遊興壯他年訪君湘水上盤桓松下弔前
賢拍手高歌答松響

陶雲汀

澍

師命題漕河禱冰圖竊惟吾

師

德在皖省曷可勝紀如癸未水災為非常
異事而奠之晏如固不獨鳳陽禱蝗一事
可并紀也因歌詠並及之

公之誠應在神公之德布在民維神聰明正直而
壹者其應如響依於人不然露筋一女子劉猛一
將軍何以有感而必伸此豈徒在精意以享之謂
禋癸未夏五淫雨淋沿江千里水無垠果然正月
得三亥桑田成海如欲淪何意塗山竹邑間乃獨
赤日揚紅塵哀哀澤國民無生扁舟上下公往巡

振廩同食不待申活我億萬之生靈自南徂北澤
欲勻山陬下邑皆躬親禱之劉猛祠蜡祭汝獨尊
汝昔驅蝗曾著勲汝今何乃置罔聞蛙鳴果爲官
鳥喙果能耘一旦蝗盡秋有成呼竒詫異民歡欣
呼竒詫異民歡欣君不聞我公當日露筋祠下曾
禱冰東風一夕成通津糧艘葉葉挂帆去今昔異
事相等倫今昔異事相等倫此在我公不在神

題朱雲峰觀海圖小照

先生方小憩翩然起觀海獨立層巖巔曠觀天水
滙扶桑日出光瞳矐天半倒翻海底紅仰觀天欲

墮俯瞰地無終不知島嶼多少國但如黑子一一
藏其中世眼小視莫睹世情窄塞莫通焉知海濶
與天空海雖濶天雖空我欲盡將萬頃波濤一口
俱吸盡瀉入先生浩蕩之心胸

琴士詩鈔

卷八

涇縣趙紹祖著

孫同璋曾孫

鵬飛蛟起

同校

晚登南樓與包二

九成

查大

森

翟大翟二

象會念會

話別

晚眺敬亭西登樓天欲低昔人遺勝蹟我輩復留
題日落一川靜雲歸千樹齊余將從此去握手語
淒淒

郊行

閒步郊原上青青細草茸偶隨流水轉時與片雲

逢鷗鳥兩三陣煙巒數十重悠然興獨往日暮發
村鐘

章平兄失子以詩慰之

乍聽肝腸斷呼號問彼蒼未能學莊老安得例彭
殤一哭情原正雙親鬢已霜莫將兒女淚滴滴灑
高堂

月夜懷雲起五叔

空堦生夜月禪室意先秋遙憶雲龍寺吾家大阮
留此身嗟壯大當世笑沉浮欲把一樽酒從僧問
舊遊

石佛寺諸友夜坐

寺館從僧借良朋對景歡秋高松色冷月落雁聲
寒雅意情堪佩雄談氣上冠夜分不成寐曙色到
闌干

與從兄采臣夜談

瑣瑣胡爲者偏因俗累紛艱難吾與汝世態雨兼
雲出璞資磨礪成材藉斧斤何須頻計較志士自
辛勤

南郊晚眺

烟霧村村起長天暮景奢落花帶歸鳥溪水瀉流

琴言錄 卷八
霞牧笛穿林遠樵歌送日斜須臾山色暗燈影出
誰家

登雨花臺

臺閣臨無地長空雨乍收目力所不到江天一氣
浮斜陽終古恨流水六朝愁悵望情何極蕭蕭蘆
荻秋

宣州寓所呈從兄師臣

久客兄攜弟熒熒共一燈無資嗟旅次拔幟喜壇
登時兄府試第一自有文章價何嫌魑魅憎聞雞吾欲舞
夜寢尙能興

初遇胡星五共登南樓

翩然年少客吐屬自風流與我初傾蓋隨君共上
樓山青當檻落水碧帶雲流不忍遽言別行行且
復留

水西

喚渡穿林竹危亭聳峭巖諸天出樓閣一徑轉松
杉忽見雲中塔斜飛樹外帆山僧正鋤地顧我語
喃喃

送翟端揆表叔旋里

昨日東風起小園花亂飛今朝芳樹下折柳送君

歸此日一分手故人兩地違躊躇不忍別翹首盼
斜暉

與李朝俊奕偶有所感朝俊宜與人

技小思偏摯營營共一枰凝神當及遠救敗在無
爭指顧機先定倉皇局盡傾從來天下事誤後不

堪驚伯甄溪曰深于奕理故能小中見大

訪胡山人蕪湖善花鳥工奕

我意厭塵俗特來尋此君山風一披拂清氣淡氛
氲怪鳥避芒眼樵柯爛白雲山人多絕技於世未
能羣

潘世伯元起同王經大攜樽過訪潘名本與

從家伯祖星閣公遊與先君子同學友好經大其戚屬也名元綸

忽有高軒過旅居喜不勝世交猶我伯問學得良
朋此日人攜酒昨宵花滿燈青氈先業在慚愧未
能承

蒼頡廟

古廟祠蒼頡空山歷歲華中宵啼鬼魅陰雨走龍
蛇漠漠野雲合蒼蒼老樹擎神工開造化瞻拜自
生嗟

汪醒弁同其弟鶴庭見訪鶴庭名鳴

忽得良朋過真忘在異鄉風流親二到聲價想三
張醒弁有兄鏡泉名本余未遇也談似風生雨心如暑後涼他年
懷舊日記取是梅黃

秦淮月

秦淮樓上月愁殺旅人心影動迴波練光驚繞樹
禽銀河懸夜永玉露逼秋深辛苦單衣客孤寒畏
受侵

登石城

舊是孫吳壘蒼蒼古木森山多割據恨江見英雄
心落日橫孤雁西風響遠砧霸圖悵消歇勝跡罷

登臨

長夜

客子憂思集中宵夢不成推窗懸漢影欹枕走江
聲數問夜將曙其如天未明昨朝家信到不悉旅
人情

送凌七華暨其姪雲韶還鳳陽

凌家叔姪好與我近相知慙得親晨夕如何遽別
離行人秋草路立馬夕陽時念我應迴首西風兩

地思

陳虞百曰五六情景逼真

送方正誼還鳳陽

作客送君還高歌行路難何年心再話昨夜月同
看我亦思歸去因為行子酸到家洗塵土應念羈

人寒

王經大日發端道勁
一氣直下格法可觀

春日望雪有懷張端甫

端甫時
館水西

寒意差堪耐春愁總欲刪登樓一長眺殘雪滿湖

山余居所對山名也在水西之子清如此風流未易攀擬都如

有作寄我不須慳

丙申春日借榻盤坑之東山寺到館有作

地僻無人到茅庵傍谷開老僧迎客入舊友喜余

來謂許聖兆曾同館石佛寺山繞千竿竹窻臨一樹梅悠然忘

物我怪鳥不相猜

與許聖兆同到西山寺

路轉萬峰西春泥踏一谿寒林風颯颯舊院草萋

萋苔色侵堦綠禽聲逐客啼悵然不能久回步下

層梯

入玉露庵

逢僧邀入寺寺結響山偏不見東堂竹空懷昔日

賢葉千里先生館此日與
同人共賦東堂竹詩烹茶能款客問業祇耕

田即此性天在無須叅古禪

與雲起五叔同赴院試途間戲作

琴言金 卷八
躑躅胡爲者年年一度遊英雄皆入穀骨相不封
侯棄去同雞肋癡來笑虎頭深秋聞雁叫試學稻
梁謀

高橋道中

落拓隨行李棲遲旅店前逢人低首過策蹇上橋
先驛路平如掌山桑怒出拳半生潦倒事此地最
堪憐

鼇峰晚眺

獨立鼇峰上城隅見夕曛橋分明鏡水鳥帶敬亭
雲有客懷前哲飄然思不羣秋聲何可聽落葉正

紛紛

與彭乾一手談

名啟元
懷寧人

坐隱寧辭久空堦鳥不喧機忘方許奕意得豈關
言之子能如此吾懷欲共論春風潛入座不覺雨
翻盆

李定周來附爨

名永國懷寧人時
余獨寓敬敷書院

一院人聲靜淒涼獨住時連床君忽到附火我何
辭但抱空囊恨更憐小僕癡旅居須共諒茶飯莫
嫌遲

過水西桃花已殘

戊戌

不見題詩客桃花恨不窮溪流三尺漲籬下幾枝
紅鼓棹同人散高歌明月中來年須早到莫使怨
東風

過水西看桃花 己亥

忽見桃花笑花心喜可知好風吹我到游目及開
時落日人爭渡歸巢鳥戀枝爲憐春去早回首故
遲遲

病中與弟繼之

時客秦淮邸舍

客病久累汝吾心殊未安頻將茗碗洗屢向藥爐
看鬻粥勸微飲持衣問可寒相依爲性命豈復慮

熒單

盛春谷曰
真摯有味

孝弟立身本古然今則難功名知有命倫類樂無
殫汝志能如此吾懷已自寬歸家教子弟好樣使
留看

闔中遇汪醒弁

我來方抱病半刺未求通豈料知心侶相逢矮屋
中三年滿塵土一夕滌春風陡覺精神健無須歎
遇窮

因汪醒弁得見端本星垣於號舍中

名煜江
寧人

中宵聞咳唾慕見已嫌遲不意來今雨翩然得導

師嗟余撓疾久未卜謁門時江上扁舟去西風寄
遠思

答張端甫見訊卽次原韻

此日已微愈無風尙覺寒病妻勞漸瘦老母憂差
安良藥隨醫製稗官以自寬幾忘多日夕三見月
團團
閉門無一事掃雪擁爐居書冊翻如失親朋見亦
疎甘肥猶忌食囚首不能梳欣得故人問精神頗
昔如

癸卯新歲將與弟繼之借榻丁溪僧舍

風光驚歲改節物見天心鬢髮吾猶漆年華汝似
金青氊先業在春雨入山深借榻西溪寺聯床共
大衾

西山望月庵卽事

夜靜不成寐龕燈豆似青雨連千樹暗風捲一山
腥倦僕驚心起孤僧側耳聽日高門始闢虎跡滿
畦町

盛春谷曰似前明
七子學杜陵之作

丁仙廟

古廟長堤上靈旗小市邊空懷仙去日不見鶴歸
年落日牛羊集荒煙草樹連居人羣祝歲獻盂麥

秋天

同弟繼之歸自山中將往赴省試肖巖四叔
以長歌贈行奉酬二章

昨自深山返今叨一日陪作詩增我氣拔幟遜人
才慚愧蹄連蹶奔波槐又開邱遲憐尺錦新樣恐
難裁

祇合山中老高堂命可違來朝攜弟去江上一帆
飛得失同流輩文章敢是非艱難吾不怨辛苦及
慈闈

泊采石

采石停舟日風濤不可行蘆洲三夜泊江月一窻
明人靜語何細船高潮暗生羈愁驅不盡况聽候

蟲鳴盛春谷曰自然

喜晤鮑仙舟

昔日南樓上相逢座盡傾三年成濶別一見道平
生夜月秦淮市秋風白下城叅軍真俊逸不負舊
才名肖巖叔曰字字穩愜

與崔雪堂泛舟秦淮慨想二陸讀書舊處

昔減三張價才推二陸雄先賢遺舊址我輩仰流
風小閣連雲密蘆溪夾岸通迴榔惆悵處煙雨繞

空濛

子隱臺

姓氏留青史行人拜故臺丈夫遺小節名士抱雄
才聞道嗟何晚成仁志不迴古今賢哲者都向過
中來

登雨花臺釀酒弔王經大陳裕源

昔日同遊處重經倍悵然故人已黃土釀酒向蒼
煙日色空江外秋聲古木邊壯懷長寂寞揮涕晚
風前

拜黃侍中祠

羅刹磯頭日淮清橋下時一門都死節兩地總心
知小渡迴輕棹秋風拜古祠科名真借重不負九

原師

公禮部殿試皆第一幼
師元翰林黃暉死元難

晚泊馬頭磯

危磯如突出孤艇傍崖過岸市人初散鄉音聽漸
多紅燈明遠渡淥水長新波此夕慈親意門閭望
若何

謁張公廟

抱冊將身殉波濤竟不侵山川同禹奠神鬼鑒公
心古壁龍蛇走虛堂棟宇深英風如在目瞻拜肅

然臨

贈幕山西印長老

我自懷齊已師能繼惠休法門遺鉢在詩社幾人

留

邑前輩與寺中詩僧寰宗唱和者今多不存

古壁存先澤

有先祖雲翔公詩

西偏借舊樓

是時借楊於此

橋頭空悵望新月又當秋

晚興

禪房初月上林際晚烟收露暗團花密星低傍戶

流水聲遙到耳夜色早驚秋暮鼓催歸卧斯須且

復留

題中流放棹圖

逍遙象外遊身世泛輕鷗對月心俱靜看雲意亦

流江湖雙短鬢天地一孤舟鼓棹悠然去蕭蕭蘆

荻秋

過望月庵有感

昔年曾借榻此日復經過老衲殷勤出迎門慰藉

多巖前留舊竹溪水漲新波去住皆多事山靈笑

若何

再過望月庵留住一日有懷盛春谷

招提仍寄宿佛火一龕明夜月依然上亂蟬無數

鳴山僧來接話舊事倍關情俯仰題詩處重看意

氣傾

癸卯與春谷唱和詩盡鑱巖前竹上

颯颯巖前竹青連屋角搖有懷黃嶽客直下浙江

潮五字工愁遠雙魚賦別遙

春谷自新安寄回一書知其返錢唐矣

空階還躑躅不寐夜迢迢

題巖石上人巖關古寺圖

萬疊連村起窅然一徑深當關笑螳臂

前明總兵范雲龍據

此以應金聲尋破雲龍死妙繪入禪心古寺藏雲密清泉踏石

尋遙知山頂客

雲起五叔

鬚斷作微吟

棲霞天開巖觀岫嘍碑

薄暮凌山頂神碑倚石巔龍蛇蕩心目風雨護雕

鐫功冠三王首書開百代先韓公作歌後好事喜

流傳

丹徒贈黃某

之子萍踪合常懷旅客悲霜華欺短鬢鐵甕滯歸
期失馬寧非福亡羊莫怨岐他鄉一尊酒珍重仲
春時

家書兼寄諸友

二月江城客春愁入酒曛登高見天末別浦有歸
雲明日家書去征帆帶夕曛梅花不堪折嶺上落

紛紛

袁簡齋太史曰通首一氣詩格最高

北固送別次兄偉堂韻

黃梅俞石農
將於次日行

名山開北固屢到愜心歡
舊雨兼新雨亭端又石
端大江流檻外萬里入胸寬
送客帆風去來朝窮
目看

江千次王荃谷韻

二月春猶冷江城况落暉
烟光含水碧鴉影帶雲
飛小步情何遠沾衣露尙微
遙知王大令雙槳棹
歌歸

自鶴林至竹林次朱梅圃韻

不啟鶴林扃

寺門不開
遂不得入

沿山到竹林峰迴藏寺密

泉斷踏雲尋古屋
糺荒葛踈鐘度遠岑
蒼涼聊躑躅回首暮煙沉

訪僧練江

掛席焦山去松寥訪道林
魚龍驚海渚風雨靜禪
心一笑春光動三生舊約尋
無絃余領取請御有
絃琴

奠僧孝先

與師非舊識來結幻中緣
粟顆藏空界針鋒入去

年

師去年告偉堂云來歲恐不得住世幸使人以
杯酒相奠余適至焦山聞其卒遂代兄奠之

梅花開古洞白鳥下寒烟
邂逅酬杯酒難澆碧土

穿

訪僧悟霈不遇

斜岡落雲路一寺竹林間老衲鵠形古春風鳩杖
閒布金開勝地浮玉見名山寺前見金焦二山為訪詩僧

到哺烏竟未還

時悟霈以探母歸

同在中自小九華至招隱寺

陟巔穿寺背磴道踏羊腸缺處開城郭高峰接混
茫雲垂千樹黑沙捲萬山黃忽見招提境鐘聲咽
夕陽

獅子窟逢野人勸酒

獸窟尋春到野人樹下逢山殺青箬裹綠蟻瓦瓶
封酒戶慙余窄真情感汝濃此間有高士回首戴
公峰

月夜逢僧巨超

一片長江月清光第幾灣敲詩逢賈島饒舌識寒

山

向耳師名於悟霈

樹影凌波亂雲心出岫閒瀾翻潮偈

合風冷不知還

別峰讀楊椒山石刻詩

千古此山遊椒山第一流詩看遺句在香自與山

留

公詩原註焦山椒山音無意相合

崖護風霜迥潮兼天地浮我

來尋舊跡高唱別峰頭

袁簡齋太史曰高唱而

入句句警亮與到之作如有神助

和巨超不波亭望月之作

夜月不波亭空濛涵太清水光連樹影雲際走江聲寺抱雙峰迴舟看一火橫趙州茶罷後偏欲以

詩鳴

袁簡齋太史曰格高句警具體唐人

和潤州詩僧悟霈十新之作

新綠

江南花事半新綠漸萋萋細雨生河曲春風入馬蹄無邊芳陌上不盡畫橋西有鳥鳴深樹迴翔翠

影迷

新柳

往事休回首長堤綠又稠官橋方駐馬少婦忽登樓好趁東風起還生遠客愁南朝無限恨并入大

江流

袁簡齋太史曰三四大雅

新燕

夢破烏衣國重來路又迷一簾春日雨二月杏花泥王謝非前日呢喃識故棲主人不相妬作伴畫

梁西

新鶯

春色滿江南春林雨氣含俄聞聲一轉未暇挈雙
柑人與天涯遠花偏故國酣垂楊千萬樹搖曳向
江潭

新筍

鳳尾臨池起龍孫繞畝分昨朝一夜雨迸破南山
雲嚙口呪成竹胸中有此君干霄會千尺戛玉翠
紛紛袁簡齋太史曰洒落可喜

新荷

荷葉碧田田偏宜四月天何來中婦鏡不比沈郎
錢倚檻驚宵露凌波待水仙此時周茂叔小立曲

池邊

新蟬

夕陽村落裏古木有聲傳正是鳴蜩候剛逢滴露
天一帘疎雨後十里亂山前斷續因風起憑虛亦
是仙

新月

又見蛾眉月灣灣上女牆黃昏潛入戶地上忽凝
霜名士裁新扇美人學晚粧何堪愁日暮復此玉
鈎傍

新涼

庭下月光滿簷前風色微攤書時近竹久坐忽思
衣病骨秋偏早蛩聲聽未稀所思成遠道靜看一

梧飛

袁簡齋太史曰四語入情

新雁

八月雁南歸秋來木葉稀孤城殘照下時見一行
飛衡岳風初迥洞庭波始微賓鴻知後到遵渚似
相依

將之白門留別僧悟霈

萬古秦淮水遙連鐵甕潮余將刺船去揮手謝金
焦此地詩僧好吾師與巨超春風縈別緒攀盡綠

楊條

袁簡齋太史曰是屈翁山學唐人之作

留別兄偉堂

一春花事盡楊柳正依依別緒滿江水長歌當落
暉搏鵬知大息小鳥學雄飛不負秋風約相期集
帝畿

自潤還省有懷梅石居

曉發西津渡微風鼓棹閒潮聲爭萬弩帆影失三

山

金焦北固亦號三山

京口杯初罷白門柳又攀此時梅八

丈翹首企余還

吳柳門曰風格道上

江行

擊楫乘風去青天絕點塵布帆張落日客思逼殘
春戍角孤城壯江雲暮色新中流懷祖逖惆悵榜
歌頻

承梅石居前輩書問

中年常作客書到豁雙眸掩戶惟遲友餘寒尙戀
裘楸枰拋已久金石校方稠書中詢及二事倘得先生顧
雄談釋旅愁

過隨園呈袁簡齋太史

野步詩人興名園太史家一官魚上竹千首骨皆
花供養煙雲妙雕鐫金石華頻來問竒字應不拒

侯巴

遲汪醒奔端木星垣值小雨不果來

雨花臺畔路風雨正紛紛不見臺邊客遙瞻臺上
雲空堦惟落葉碧水自生紋獨把一尊酒秋聲何
可聞

喜晤汪鶴庭三哥

苦憶真成夢相逢正值秋十年吾濶別薄宦汝雄

遊鶴庭官廿話到忘情處交能古道留翻從欣喜

後幻出舊時愁

况是前遊處高臺四望通大江窮目力落葉響西

風爾我重相見交知半已空謂陳裕源鬢毛皆老

大長在別離中汪醒弁曰兩首一氣舒卷祇如一

語真筆健老氣橫秋

得茅縣丞書詩以代柬茅名琳丹徒人時攝寧國縣篆

山居秋更早境靜地猶偏漫喜魚書達剛逢驛使

傳才高輕百里報最異三年定展治中足方知騏

驥先

山門遠眺

水落石根出秋清天宇高煙低半村樹風急一山

濤日暮牛羊下雲虛鴻雁翔濁醪不可醉聊學寓

觀濠

琴士詩鈔

卷九

涇縣趙紹祖著

孫同璋曾孫

鵬飛
蛟起

同校

喜張簪山至縱酒夜談

不見張生久相思似少文到門黃嶽雨連我幕溪
雲巴里歌曾唱瀟湘袂未分翩翩能復顧剝啄慰

離情

簪山將為湖南之遊舊曾作詩送之不
果行也今歲乃復訪我於幕溪之上

遠橐丹青至婁東派有聲名高九畫友品重四先

生無意逢真賞有心作此行

簪山偶得王烟客李
檀園二畫特攜以示

余寒溫猶未暇展軸試余評

行樽還促膝譙漏聽將殘酒以知心醉魂憐異域

單畫友周碧山舊與簪山比鄰後客死揚州蟲聲雨前斷花影月中寒

寂寞悲遺冊挑燈欲讀難碧山曾為余作小冊

老矣今何力無成事事虛神交多好事寄信索吾

書項筠圃張慕西皆未識函並託簪山索書枉自羞藤楮真堪飽蠹魚

憑君談六法悟入折釵餘

有客都門去應知先著鞭相思成兩地賦別已經

年百尺竿頭路三秋雨後天升沉余自定不必問

神仙鸞仙周坦人謂崔雪堂百尺竿頭自有進步今貢入成均不知果有當焉否也

我輩行藏在風流喜自誇枯腸出芒角縞素走風

沙無識悲庸史知名付鑿家自今須善愛莫謾說

塗鴉

含山子近讀蒙莊詩以寄之巧坑僧玉輝自號含山子

道釋更相軋千秋犄角深寧知九轉火不及一圍

金胡抱蓮花骨翻多蝴蝶心悟來齊物論一笑不

能禁

下坊渡口

古渡截流過粼粼灘石清水聲奔萬馬山勢抱孤

城野店臨河澗炊煙接樹平漁歌何處響回首一

燈明

有懷僧巖石

時在湖南

三楚雲山外秋風憶遠僧扁舟江上去大別雨中
登竹寫湘君怨詩成山鬼憎歸來應贈我逸興滿
溪藤

同人夜集族弟孫年小圃

小圃朋交集當軒月正華分曹人角技一霎雨飛
沙醇酒有春意寒梅無仰葩養生同此理物性悟
來奢

喜盛春谷至

不見先生久於今十五年欵門驚是夢握手語相

憐老我雄心盡看君白髮鮮新詩差可愛猶得互
流傳

題張簪山為陳慕西作青甫先生讀書圖

慕西

師也

談經似揚子問字得侯芭遠想音容古空嗟著述
奢傳神欣有客落筆妙無涯此事堪千載留為藝
苑誇

梅林書屋有感

翁昔仙遊去余行竟未還西州常抱慟聳谷不能
攀此日留遺墅當門見好山卅年方一過不覺涕

潛潛

梅林夜雨有懷倪鑑平

時在湖南

為想交情好頻年約我遊主人方外出客子忽來
投夜坐梅林雨心隨漢水流君歸應有恨時事不
相謀

望蘭石俞將軍墓雨不能到

忠魂埋骨處一徑繞山巔寥落行踪斷蒼茫雨後
天居人多古意指點說前賢不拜將軍墓吾心獨
恹然

胡烈婦墓

深閨有竒節烈士未能先皎日明同穴丹心殉所
天春山埋古雪行客聽啼鵑莫把女貞樹但將連
理傳

元宵後一日有招友看梅賦詩者戲作一律

以柬花

令節元宵過春寒未放梅忽聞芳樹下已有一枝
開主喜賓俱集花嫌我不來明朝須早到獨作好
詩催

王孝子詩

孝子名百順業皮匠尤為難得也

誰知王氏子至性動人天工是民之細孝為行最
先用勞如一日泣血又三年廬墓終身志居然邁

古賢三年後眾毀其廬乃歸

孝弟為仁本純儒愧事親節文原在禮椎魯倍能

真一意行吾志千秋有此身昔聞文與鳳今又見

斯人余有文孝子震鳳孝子粹然詩

家家餽薪米嘖嘖偏仁鄉族有賢者侶能將此事

揚一詩傳卓行五字播孤芳族某為作五言百韻詩備述其事敬

告輶軒使采風慎勿忘

謁橫山廟

軼事同神禹心疑敢腹誹野雲連舊隴古廟颺靈
旗一壁功難就南江道更非土人皆敬事不肯食
全豨

偶成

翩然來不速無味強相攀熱客擾人靜冷官破我
慳一樽求可得貳簋設何顏可笑叟偏甚回頭自
看山

和呂幼心太守豐樂亭原韻

太守與民樂昂然留此亭泉噴幽谷綠山發野芳
青九老同斯祀千秋尙有靈徘徊神座下敢使我

心寧

亭後有九老堂祀唐宋名守或書諡或書字或書官與地惟李衛公獨書名返而為之心不寧者數日冀我公之有以改之也

昔賢何必讓示我有周行政簡知民樂風醇在吏

良舟車嫌地僻

滁商賈至者甚少

山水引心長青史他年

筆傳公姓氏香

清流關和幼心太守原韻

往事問南唐雄關勢尙昂雲間雙劍合鳥道百盤

長戰氣今銷盡民風古號良此中有賢守不獨宋

歐陽

虎邱劍池

藏劍吳時葬秦皇鑿壁求霸圖皆渺渺池水尙悠

悠往事誠難問相傳或有由刊銘勞辨論自詡作

儒流

訪詩僧寰宗墓不得

寰宗吾涇詩僧與余先世有舊客死於蘇劉南

廬偕同社詩人葬之於虎邱

虎邱山下路策蹇且從容為憶高僧好來尋舊塔

蹤深林聞磬遠古徑有雲封欲去殊難忍回頭意

更恫

真娘墓

道旁驚所見草綠舊時裙為訪詩僧墓剛逢艷女

墳斜陽無片影夜月有歸雲白傅佳吟在高歌解我醺

題朱席珍小照

名聘蘭坡姪余時將自南翔返蘇

翩翩後來秀可以繼前賢喜得忘年侶相逢二月天扁舟去吳郡把手古由拳努力崇明德臨岐正黯然

自蘇至杭寓族姪聘臣公館

聘臣名世珍時為杭江漲分司

別後長相憶初逢反愴神官微憐汝病客久歎余貧樽酒先申意征衫未拂塵一門皆聚首異地倍相親

聘臣弟仲文及其子皆在公館

泛舟西湖

武林門外步偕伴共呼舟煙水蒼茫際琴書汗漫遊春殘花事謝虹見雨痕收欲上雷峰塔三潭月已鈎

過蘇小小墓

短碑眠道側雜遝過游軒有客談佳話無人掃墓門鶯花春作主環珮夜歸魂遠寺聞鐘磬荒荒月一村

晚泊高淳湖

蒼茫杳無際晚泊水中隈不寐夜偏永無風檣似

摧人稀驚犬吠水響喜船來可厭舟人睡酣聲大
若雷

桃花夫人廟

傾城原有此息蔡一時亡廟貌居然在游人尙若
狂簾前唳鳥換門外野花香千古貳臣傳可能心
共傷

滕王閣

偶上滕王閣飛飛蛺蝶來江天遙縱目雲物喜宏
開主似閻公少人無王子才客懷殊寂寞覽古獨
徘徊

皖江聞內子病

頻年長在外知汝困愁魔信覓鄉人問疑生夜夢
多秋風催木葉驟雨湧江波性急舟偏滯真堪喚
奈何

題崔金南寒蛩吟

未識先生面詩名有客傳昨宵一披讀清韻滿遙
天我亦高吟者常哦舊友編

謂雪堂

得君成二妙同

踞碧山巔

落落碧山上遙憐黃嶽高發聲振林木長嘯鼓風
濤漫說蟲吟砌如聞鶴唳臯况知多令德不獨作

詩豪

題彭筠溪全家樂園

筠溪名輔周雲南霑益州人今為青陽令

小圃隨緣築宦遊卽是家愛民推夙志玩物惜春華
訟聽無留獄公餘早放衙一門同茂對樂事更何加

題柳濱垂釣圖

放艇高歌去毳毳柳十尋年華霜髮改風雨一溪
深或兆龍鵬夢原無蕉鹿心得魚何必羨山水有
清音

辛卯紀異

道光十一年

江勢不下注奔濤驚倒流連村無剩屋入市盡乘
舟鳥雀巢無所魚蝦樹上遊仰祈神禹力鞭付谷
王收

有以雅頌同文命題者此非歐陽公本意也
聊為賦之以當石鼓之歌云爾得蒐字一
百韻

文章同雅頌獵碣記西周昔自陳倉顯今還太學
留當門排十笏歷世更千秋不定文宣造無疑豐
鎬休非熊初入夢四牡駕言遊渭水元璜得王城
赤芾修萊山植虞表因隙講時蒐將士騰千騎君

王駕六騮三驅羅虎豹七校擁貔貅拂日開龍旒
翻霞動畫旂餓鴟聲箭急錦馬望雲稠坐作山俱
靜奔馳水共流弓鳴蒼隼落劍擊白猿愁揮犬還
隨軫呼鷹忽脫鞴從禽嚴訓誡習旅想綢繆酌醴
賓同樂獻豨心更悽充庖惟下殺驅逆自旋轉野
曠無驚牧農閒未釋耰畢榮調鼎籛方召賜圭卣
著作收髦俊干城足好仇何人推巨手作賦頌皇
猶浩氣噴江海儲材簡勃溲歌成天子慶寫此萬
邦揉鑿險嵌寒壁剝圓比大球奇銘開築削輿語
紀驅虜鬱律縣秋蚓盤拳走玉虬薤披飄鳳尾蠆

卷落銀鈎缺畫欹藤蔓枯形逼罽毼珊瑚交碧樹
矛戟雜岑整揖頡遙追帝窮揚徧問侯細觀頻畫
肚欲讀忽箝喉莠草禾初秀披雲月尙瞽得真神
自躍已信目重搆靜夜資搜剔空庭作呶嘍偏旁
推一一波拂想想悠悠貫柳惟魚鯉齒弓卽鹿麇趨
夔粗可識旛驥頗能紬漸覺文俱順翻知義更週
雄辭敲玉碎逸響薄雲浮盛德非離黍明時憶咏
騶車攻勤講武時邁遠巡侯吉日田從禱敷天命
對哀威靈誇震疊遠邇盡懷柔川岳隨安奠神祇
想允猶應同清廟薦得與鹿鳴酬金奏聲知巨工

歌韻獨道對揚奚有愧燕饗定無尤轍迹窮齊楚
殺函阻逗遛名卿隘西俗至寶隱偏陬正樂因遺
此編詩竟未收新宮篇已逸狸首句難讎遂使琳
琅美如同瓦礫投強秦陳法律悍俗厭軒輶灰劫
悲書冊機關殫魯鄒恣橫方作焰指擊豈無憂定
賴鬼神護常煩苔蘚擷牧牛時厲角野火未焚蘓
白璧幸完趙金刀欣兆劉抱殘勤顧慮保闕日優
游挾冊新除令搜竒豈有由沉埋藏草萊戰伐閔
戈鋌六季還潛彩三唐大顯幽探竒崇李品好古
發韓謳蓋覆期簷厦遷移裏席裯媿嬰誰著手感

激肯爲謀置序初傳鄭繹文始自歐從茲光鼎價
因且以金鏤飄泊離河洛遷徙到北州疏通由此
盛疵類於中求篤好時藏枕攻瑕亦借籌紛爭如
敵國疑信畫鴻溝或卽先賢語重操入室矛自堪
鎮嶽瀆何用撼蚍蜉落落神偏旺怱怱美豈俯嶧
山風颯颯碧落鶴颺颺冰弱奚能擬包庸未足儔
幸非淪濟水猶得薄岫嶺况是鈞天奏寧如暮燕
啁高文達醇意莊重絕俳優浮靡南朝豔粗豪北
士羞敷詞皆雜還衆噪等嘈啾豈有宇文置能將
三代侔腐儒無好尙慕古似飢調未覩雍宮盛頻

于拓本搜丹黃窮妙墨晝夜豁星眸石壁鴻都散
 銅盤汝刻勾玉岑遺古鼎鐘觀出重樓漢尺題躬
 校秦泉帶自舟瓦當哀種種碑誌讀悠悠隨筆聊
 成記懷疑每有諷已看千百集差幸二三蹂誰若
 岐山鼓珍為席上璆象形異科斗雅調繼麟鳩揚
 厲無矜伐鋪張絕競綵倘教入篇什定不別薰蕕
 簪筆今如見隆功遠更脩丙申雖可紀甲乙竟終
 度裝潢為藏弃摩娑憶向疇操觚疑史籀未見惜
 尼聖節取文忠跋是非果定不

到茂林村寓吳位三別墅

墅名叢竹山房

仁里吾初至征衫未拂塵溪邊方問渡使者已迎
 賓舊雨爭為主天涯本若鄰入門邱壑美有道犬
 雞馴下榻留徐穉開樽似季倫羣稱半刺史我識
 老詩人挿架竒書滿撚髭妙意新青山留好客叢
 竹憶前因位三有叢竹山房夜宿同佳聲時同左
村即位三晨興訪眾姻雄談消永日公事得閒身仙洲至
之婿也髯僕勤無怨諸郎意更親來朝馳馬去長此飲君
 醇

送鄧石如旋里四十韻

石如不來涇者二十餘年矣十載前曾於

白門一面今秋為廣陵之遊迂道來訪喜
 其重至與之同遊琴溪幕山水西諸勝且
 為朱姓書學宮禮器碑留連十餘日既而
 有疾遂勸其勿往廣陵買舟而歸為敘其
 事作詩以送之不知尙得相見否也

廿年如彈指十載不相逢忽向揚州去言尋涇水

蹤溯流來訪友念舊正愁儂故老凋零盡叔台巖兄平山

元一皆石如舊悲歌意態慵相憐真惻惻握手更

憧憧地僻名山好賢來遊興濃自言會屢到未得

少從容藉我為東道相將出北墉驛塵揚黯澹佳

氣望葱蘢古道平如掌長橋卧若龍仙人乘鯉去

洞口有雲封夾澗橫千嶺臨波聳一峰摩崖觀篆

籀剔蘚厭蒙茸山有宋劉誼林淳諸摩崖刻竹徑穿林倦居人

禮客恭肴蔬多野味餅麩出家春入夜憐殘月侵

晨索早饔回車遵舊軌大幕正當衝弔古思唐守

乘城有大庸青林方破賊黃嶺尙傳烽此地屯軍

密當年開府重自大幕上至小幕皆左戴國公幕府故名野花園舊壘

兵氣靜禪鐘忽忽尋三寺殷殷問五松河干風颺

颺渡口水淙淙上下聯雙塔登臨仗短筇大觀摹

古刻塔上有大觀石刻一指避狂蜂過一指庵誤踐其菜幾為

園丁興盡歌霜露言歸到辟雍欲尋黃叔度

學博黃緝

庭石如人恰遇郭林宗訝昔知名久欣今聞足楚瑠

同鄉人如恰遇郭林宗訝昔知名久欣今聞足楚瑠

如椽常自負有客忽相從朱題鹿角雄談折雷尊

闕里供兩廡陳俎豆東序設鐘鏞妙意思韓勅書

成似蔡邕沉沉方一樂戚戚已無悰咳唾風飄玉

呻吟響答蛩君行猶戀戀吾意甚忪忪旅次誰為

伴殘年况逼冬分無騎鶴望宜作閉門傭送汝登

舟去潜然涕滿胸

鵠鷓三十四韻

代人應試

有鳥當春故故鳴朝朝野外喚春耕聲傳穀雨兼

芒種啼徧晨陰與夕晴正值協風方告至似催品

物慶齊亨韶華先報時初急稼穡思艱候欲爭粵

自農祥侵曉正還占斗柄指東傾土膏動脉勾俱

達木德司天甲盡萌活意向涵微露潤生機潛發

震雷轟草舒作帶天然巧榆放為錢製作精楊柳

晚煙千樹合桃花流水一溪平芄芃秀麥雲低捲

漠漠芳畦繡欲成陌外無端聲乍嘒田間有意聽

還驚紫冠竦竦迎風舞黃褐斑斑映日明呼婦枝

頭尋舊侶穿林深處踏繁英欣逢飛絮調音好競

逐遊絲拂羽輕
啣得蜻蜓常過屋
結將鷗鷺許同盟
依稀不定如聞語
仿佛云何亂喚名
谿勃婦姑干汝事
脫來禪布勸誰營
插禾割木心奚熱
布穀催科意更怛
未足攜柑從密蔭
竭來買鏡赴春城
新泥滑滑深三尺
野水盈盈碧一泓
南畝笠聲搖軋札
東菑臺影看縱橫
荷鋤客去穿花徑
帶月人歸隔豆棚
白屋村頭偏蘊藉
烏犍笛外更淒清
蛙鳴閣閣千畦鼓
鶯語綿綿夾路笙
水郭遙瞻翻白鷺
晴沙空自占鷓鴣
紅霑絲雨餘春送
綠滿針塍首夏迎

聖主深恩勤蒞屋

躬耕有典念齋盛
日咨保介還行野
禮逮公卿况爾氓
千畝旣終知大有
三時不害自敷榮
玉禾翼翼神倉貯
金粟垂垂

御廩盈始識有聲
皆獻瑞縱茲微物
亦呈禎化鈎常作
懷中寶刻杖還扶
老者行率土西成
咸鼓吹大鏞東序
正旬鏗紛飛上苑
棲遲好聽爾蹒蹒
舞五韻

